



## **Jalan baru di Raub dibuka Ahad depan**

Oleh Nor Fazlina Abdul Rahim - Jun 18, 2023 @ 6:30pm  
nfazlina@nstp.com.my

KOTA BHARU: Projek Lingkaran Tengah Utama bagi pakej 5B dan sebahagian pakej 5A dekat Raub, akan dibuka pada Ahad depan.

Timbalan Menteri Kerja Raya, Datuk Seri Abdul Rahman Mohamad, berkata projek berkenaan disiapkan lebih awal berbanding jadual asal pada Disember ini.

Katanya, laluan itu dipercepat berikutan jalan berkenaan akan dilalui kira-kira 500,000 kenderaan sama ada penduduk Kelantan dan Pahang pada Aidiladha ini.

"Bagi pakej 5A dan 5B membabitkan 17 kilometer (km) itu, pengguna akan susur keluar di persimpangan Universiti Teknologi MARA (UiTM) Raub sekali gus mampu menjimatkan masa sekitar 40 minit.

"Laluan berkenaan sepatutnya siap lama lagi, namun mengambil kira kepulangan perantau pada Aidiladha ini, saya meminta Jabatan Kerja Raya (JKR) supaya percepatkan projek ini.

"Alhamdulillah dapat dipercepatkan dan laluan ini boleh dibuka pada 25 Jun ini," katanya.

Beliau berkata demikian pada sidang media selepas merasmikan Mesyuarat Agung Tahunan Kali Ke-44 Persatuan Kontraktor Melayu Malaysia (PKMM) Kelantan, di sini, hari ini.

Yang turut hadir, Pengerusi PKMM Kelantan, Datuk Mohd Rosdi Ab Aziz.